

DILGIPA ARO JARIKGIPA APSAN DAI GNANG:

Mrs. Bejitha A.Sangma, Asstt.Pastor NBC.

Aganchengani:

Elisha saksu Elijani School-ni Student ba ja-rikgipa ong-a. Elijani dong-jahani jamano uan Elija-ni School-ko chalairikaha. Uni skigipa Elija maikai Isol-na kakket ong-aha uandaken uaba Isol-na kakket ong-e dangdikaha. II Raja 6:1-7-o jekon seaha uko anga ia chanchianiko naatna namnikbeenga. Iano ua saksu dilgipa ong-e maikai kam ka-aha aro uko uni ja-rikgiparang maikai un baksa nangrimani gnang ian aiao inmanbeani ong-a. Ian da-ororo an-chingni Mondoliko rikanioba dakchakbeani ong-gen. Dilgipa aro ja-rikgiparangni gisepo maikai dakchakgrikani nangrimgrikani ku-monggrikani aro bakrimani mande ra-ani gnang iano namen skianiko on-a. Dilgipa aro ja-rikgiparangni gisepo daiko ra-e janggi tanga.

I. Nangrimani Rikrimana skani dong-a : (Pod 1-2)

Elisha Katchinikgipa-ni chalaienggipa school uamangni jolo namen mingsinggipa ong-aha maina uni kamrang Isolo bi-anirang baksa namen Isol-ni bilko nikna man-aha. II Raja.4:1-7-o nikna man-a Katchinikgipani depante-ni jikgipana songgimikni aragipa todili-ko gapatoke uamangni groko chotna dakchakaha aro dong-kugipachi uamangna tangna dakchakaha. II Raja 4:8-37-o nikna man-skagen Shunemo banji me-chik-na oko kena patianiko on-ahaon ua me-chik oko ke-e depanteko baaha. Ua depante siahachim, indiba bi-ahaon tangchapilaha. II Raja. 4:38-41-o karap ong-mitting somoio katchinikgiparangni dedrangna alduaha. II Raja.5-oba Naaman-ni konchiritam saaniko an-sengataha. Banga aiao inmanani kamrangko ka-ahani gimin uni school-o bi-sarang bangbateming uamangni dongchakgipa nokara uamangna chu-ongjaha. Unigimin nokko uamang jinma rikna ku-mongrimaha. Elisha School-ko skotong ong-e chalaioba Infastructure-ni giminde simsakjasama ba Salgro-ni songnok gimiko Isolni Kattako aganahani gimin jakchakjaesa ukode name aganade man-jaha. Indiba uamangni dilgipa jakchakjaoba ja-rikgiparangonin chanchie uamangni dilgipani namnikaniko (permission) bi-aha maina uamangni dilgipaoni ra-chakanikode (approve) nangachim. Uni gimin uamang krongrangko chimongna Elisha-o jinma singanio uamangni ku-mong nangrimani dong-aniko nika aro uamango rikrimani bakrimanio ku-cholsan ong-aniko mesoka. An-chingni Mondolirango Institution-rang Organization-rango aro songo nokoba badiaba kamrangkode dakna nangchongmotgipa ong-oba dilgiparangoniba nikchangna man-aia. Indake ong-engode ja-rikgiparangoniba agan-mesoke chanchianiko naatna ra-bana nanga.

II. Dilgipa-ni dong-paaniko nangnikani:(Pod 3-4)

Elisha an-tangni manderangni chanchigrike dakna mangsonganiko namnikpaaha aro uamangni bi-a gita Jordanchi re-ange krongrangko ra-bana watataha. Indiba uamangni saksu aganaha “Na-a ka-sapae nangni nokolrang baksa re-pabone”. Iani miksonganide Elisha-koba uamang baksa Jordan-ona re-e krongrangko am-sandipaaniko nangnikengahim. Permission ba approves ka-e on-akosan ong-aija uamang baksa re-pae kam ka-aniko nangnika. Unon Elisha aganchakaha “Anga re-gen” ine ku-rachake ua uamang baksa re-angaha. Uamango ku-cholsan ong-ani nangrimani bakrimani dong-ani gisepoba saksu dingtangtegipa mande jean uamangni dilgipa gri mamungkoba dakna sikja. Elisha namen kamrang banga jakchakgijagipa ong-a. Indioba uni manderang uko nangnikani gimin ua krongrangko sandina Jordanona uamang baksa re-angpaha. An-chingni Krimarango Mondolirango aro Bipekrangoba indake ong-tokbeanirang dong-a. Dakna nanganirangko chanchie ra-chakgiminrangko chu-sokatna dilgipa gri dakna man-arangkoba a-bachengatja. Pilakon dilgipani dong-simakosan nangnikaia ja-rikgipararade chu-sokatna manjawa gitasan chanchiaia. Elisha jakchakjabeoba krongrangko sandiangpaaha dilgiparangba jakchakjaoba ja-rikgiparang nangnikengode somoiko on-na nangaia.

III. Gimagipa janggina ka-oksiani:(Pod 5)

Uamang Jordan-ona sokeon krongrangko den-peengachim, unon saksu ruani bisilko chio ga-akataha. Aro ua grape aganaha, “Himangai, angni gitel! Maina uan ra-chakgiminsa. Ia mande jean Isol-na dang-dikna sike Elishani School-o poraiengachim ua namen kangalbegipa ong-achim uni giminsa ua gipini ruako ra-sroe krongko dena re-angpaahachim indiba da-o ua ruakon chio ga-akataha. Ua ruako chotpilna ua man-jawachim maina ua ruako brena tangka dong-pajae ruako nogkhipana chotpilna manjaode uni janggi tanga gimiko ua gro nanggipa ong-genokchim (Toe Skiani 22:7). Uni gimin ua namen duk man-bee grapaha. Haida ua mande an-tangni rua ong-ode indake duk man-jawachim aro

grapjawachim. Sakgipin-ni bostuna ka-saani aro uko gimatna sikgijaniko mesoka. Grapani uan uni ka-tongoni kaoksianiko mesoka, aro ua gimagipa rua gimagipa janggi gitan ong-a. Ua mande badita ua ruako nokgipana chotpilna daiko ra-e una gisiko ja-jrengbeaha aro kenahachim, ugitan Isolni an-chingna on-gimin janggirangna ka-sae ka-oksie simsakani aro uamangna mikchi baksa bi-aniko nanggenchim. An-chingara badita sak gimagigipa janggina ka-oksiani gnang? Gimagimin janggirangna ka-saani aro ka-oksiani mondoliogipa bebera-giparango aro dilgiparagoniko nikjaode Nama Kattako mondoli jatrangona sokangatna man-jawa ine an-ching gisik ra-na.

IV. Sandiani aro Mesokani: (Pod 6)

Rua chi ningchisa ga-akanga aro bano bachipak ga-akaha nikna manen neng-beani ong-achim. Elisha ua mandeo bano ga-akataha singoba chi ningoniko mandearini mikronchi nie ma-sina nengbeoba ua mande biapko mesokaha. Ua kangalgipa ong-oba Isolna dang-dikna sikgipa bakrimgipa rikrimgipa ong-an baksa gimagipa janggirangko sandigipa aro mesokgipaba ong-aha. An-chingni Gitel Jisu Kristo Luk 19:10-o agana “Maina gimagiminko am-na aro jokatna Mandeni depante re-baaha”. An-chingba gimagiparango am-sandigipa aro bi-achi Isolna aro dilgiparangna mesokgipa ong-na man-a. Gimagipa janggirangna Isolni kattako agana angade ramramgipa ja-rikgipasan man-jawa ine chanchinaba gnang indiba am-sandiani aro mesoke on-gipakoba Isolni mondolio nangenga.

V. Jaktangko Isolna On-ani: (Pod 7)

Chiningoniko ruako ra-dona Elisha chiningchi napangjaha ua bolko densote chiona galonatahaon rua chiningoni balbobaha. Aro Elisha uko an-tangona ra-doaha. Bolcheksi chumbuk ong-ja ruako radobana aro chonbegipa silmangba chiode balbona manja sriptelaiachim. Indiba ua somoio Isol an-tangni manderangna papo sripaoniko jokatna aro kema ka-aniko on-na sikani aro man-aniko mesoka. Da-oba Isol indakgipa aiao inmananiko dakna man-a. Indiba an-chingni jakrangko Isol nangnikenga. Elishaba ruako an-tang jakchian ra-doe ua mandena on-na man-genchim indioba ua mandeni jakko Isolni aiao inmanani kamko bak man-atpana nangnikaha. Uamang sakgnian ia Isolni aiao inmanani kamo jaktangko on-aha. Uandaken an-chingni gisepoba ja-rikgiparang aro dilgiparangni biljak aro chanchiani bakrimani ku-mongani Isolna gamchatbea.

Bon-atani:

A-gilsako banga chu-sokgipa dilgiparangba an-tangari saksan kamrangko ka-e chu-sokatgipa ong-ja, indiba uko dakchakgipa banga ja-rikgiparang uni jamano dong-a. Niksenggipa Mondolirangoba Krimarangoba dilgiparang senga sapani giminsande ong-aia indiba banga bebera-giparangni bakrimani bi-rimani on-rimani ku-mongani don-dimani giminsa Isolni jakkalaniko man-a. Mondolini dalrooroani silrooaniara dilgiparang aro ja-rikgiparang badita Isolni ka-saani kema ka-ani ning-tuaniko u-ia inditan silroora aro dalrooraniko ong-atna ama. Ka-saani ka-oksianiko ong-ata aro ka-oksiani dong-osa an-ching gimagiparango am-na aro uamangna bi-na gisikni dilako man-gen. Uni gimin hai an-ching dong-kuenggipa kamrangko chu-sokatna ku-cholsan dairangko ra-na.
